



**REPUBLIKA E SHQIPËRISË**  
**-AUTORITETI I KONKURENCËS-**  
**Komisioni i Konkurrencës**

Nr. \_\_\_\_ Prot.

Datë 15 / 05 / 2009

**V E N D I M**

**Nr. 111 Datë 15.05.2009**

**Mbi**

**autorizimin e përqendrimit të realizuar nëpërmjet transaksionit të shitblerjes së 76 % të aksioneve të OSSH SH.A nga Ministria e Ekonomisë, Tregtisë dhe Energjetikës tek shoqëria Cez a.s.**

Komisioni i Konkurrencës me pjesëmarrjen e :

- Znj. Lindita Milo (Lati) Kryetar
- Z. Lush Perpali zv/kryetar
- Znj. Servete Gruda Anëtar
- Z. Koço Broka Anëtar
- Znj. Rezana Konomi Anëtar

Në mbledhjen e tij të datës 15.05. 2009, shqyrtoi çështjen me :

**Objekt:** Autorizimin e përqendrimit të realizuar nëpërmjet shitblerjes së 76 % të aksioneve të shoqërisë OSSH SH.A nga Ministria e Ekonomisë, Tregtisë dhe Energjetikës te shoqëria Cez s.a

**Baza ligjore:** Ligji nr. 9121, datë 28.07.2003 “Për mbrojtjen e konkurrencës”, neni 24, shkronja d, nenet 10-12, në veçanti Kreu III “Përqendrimet e ndërmarrjeve” nenet 53-56, 58, Rregullorja “Për zbatimin e procedurave të përqendrimit të ndërmarrjeve”, Udhëzimi “Për formën e njoftimit të përqendrimit dhe mundësinë për njoftim të thjeshtuar” dhe Formulari “Për njoftimin e përqendrimit”.

Komisioni i Konkurrencës, pas shqyrtimit të raportit për përqendrimin e realizuar (përfitim kontrolli) të shoqërisë Cez a.s tek shoqëria OSSH nëpërmjet blerjes së 76 % të aksioneve dhe relacionit të Sekretares së Përgjithshme,

## V Ë R E N S E:

### I. Transaksioni dhe Përqendrimi

Transaksioni i blerjes së 76 % të aksioneve të shoqërisë OSSH SH.A nga Shoqëria Cez a.s. është realizuar nëpërmjet "Marrëveshjes për blerje aksionesh" e datës 11 Mars 2009, nënshkruar nga Ministria e Ekonomisë, Tregtisë dhe Energjetikës, (METE) dhe shoqëria Cez a.s.

Marrëveshja e datës 11 Mars 2009 e përqendrimit të synuar, në përputhje me kushtet e përcaktuara në nenin 4 të kontratës së lidhur ndërmjet palëve është miratuar<sup>1</sup> nga Parlamenti Shqiptar me datë 23 Prill 2009.

Përqëndrimi i realizuar është njoftuar pranë Autoritetit të Konkurrencës me shkresën Nr. 133 Prot, me datë 18 Mars 2009, brenda afatit ligjor të përcaktuar në nenin 12 pika 2 të ligjit "Për mbrojtjen e konkurrencës".

Transaksioni i njoftuar paraqitet si përfitim kontrolli i drejtpërdrejtë ku OSSH SH.A do kontrollohet nga aksioneri mazhoritar Cez a.s si zotërues i 76% të kapitalit aksioner me të drejtë vote. Ministri i Ekonomisë, Tregtisë dhe Energjetikës si përfaqësues i shtetit shqiptar do të zotërojë 24 % të aksioneve.

Transaksioni kryhet në përputhje me Ligjin Nr. 8306, datë 14.03.1998 "Për strategjinë e privatizimit të sektorëve me rëndësi të veçantë"; Ligjin Nr. 9889, datë 20.03.2008 " Për përcaktimin e formës dhe strukturës së formulës së privatizimit të shoqërisë anonime "Operatori i Sistemit të Shpërndarjes" dhe me Vendimin e Këshillit të Ministrave Nr. 835 datë 11 Qershor 2008.

Transaksioni i realizuar ndërmjet palëve pjesëmarrëse në kuptim të nenit 10/1/b dhe 10/2 të Ligjit nr. 9121, datë 28.07.2003, "Për mbrojtjen e konkurrencës", i ndryshuar, është përfitim i kontrollit të vetëm.

Autoriteti i Konkurrencës ka zhvilluar një hetim të përgjithshëm në sektorin e energjisë dhe është shprehur me Vendim Komisioni Nr. 90, datë 07.10.2008 "Për disa rekomandime për liberalizimin dhe rritjen e konkurrencës në sektorin e energjisë elektrike". Komisioni i Konkurrencës nëpërmjet këtij vendimi i ka rekomanduar OSSH sh.a. "që për çdo rast të sigurojë aksesin në rrjet të të gjithë konsumatorëve në përputhje me rregullat e sjelljes së operatorëve me fuqi të ndjeshme në treg dhe që të marrë të gjitha masat për të përmbushur detyrimet e kontratës së shit-blerjes së energjisë elektrike të lidhur me prodhuesit e vegjël".

---

<sup>1</sup> Ky miratim së bashku me Autorizimin e përqendrimit nga Autoriteti i Konkurrencës, është kusht përmbushës për relizimin e transaksionit sipas Nenit 4 paragrafi 3 i Marrëveshjes për blerjen e aksioneve, date 11.03.2009.

## II. Palët në transaksion

**a. Ministria e Ekonomisë, Tregtisë dhe Energjetikës, (METE)** aksioner 100% i kapitalit aksionar dhe njëkohësisht **shitës** i pjesës 76% të kapitalit me të drejtë vote në shoqërinë **Operatori i Sistemit të Shpërndarjes (OSSH SHA)**, në cilësinë e **shitësit**. OSSH SH.A është një shoqëri me kapital 100% shtetëror, e themeluar dhe që funksionon sipas legjislacionit shqiptar, me numër rregjistri K72410014H, me seli në adresën “Blloku Vasil Shanto”, Tiranë. OSSH është pjesë e Sistemit Elektroenergjetik të Shqipërisë të krijuar në vitin 1957. OSSH SH.A është operatori i vetëm publik që vepron në tregun e brendshëm të shpërndarjes së energjisë elektrike.

**b. Shoqëria CEZ a.s,** në cilësinë e **blerësit**, është një shoqëri aksionere, e themeluar dhe që funksionon sipas legjislacionit çek, me seli në Pragë 4, Duhova 2/1444, 14053, Çeki, e regjistruar në Rregjistrin Tregtar të Gjykatës së Rrethit Pragë, me numër dosje 1581 “CEZ a.s”<sup>2</sup>.

Shoqëria CEZ a.s, është prodhuesi më i madh i energjisë elektrike në Republikën Çeke, të krijuar qysh në vitin 1992 nga Fondi i Pronësisë Kombëtare dhe është shoqëria mëmë dhe kryesore e CEZ Group. CEZ Group është krijuar në vitin 2003, nga bashkimi i ČEZ, a. s. me pesë kompani shpërndarëse rajonale çeke.

## III. Xhiro e ndërmarrjeve

- a. Xhiro në **tregun ndërkombëtar** e realizuar nga shoqëria CEZ a.s<sup>3</sup>, është xxxxxxxx CZK<sup>4</sup> = xxxxxxxx Lekë; dhe
- b. Xhiro në **tregun e brendshëm** e realizuar nga shoqëria OSSH sh.a<sup>5</sup>, është xxxxxxxx Lekë.

## IV. Tregu përkatës

Në përputhje me rregulloret dhe udhëzimet për përqendrimet dhe sipas veprimtarisë që kryejnë palët pjesëmarrëse në këtë transaksion **tregu përkatës produkti** do të konsiderojmë:

- (i) **shpërndarjen e energjisë elektrike dhe;**
- (ii) **furnizimin/shitjen e energjisë elektrike.**

**V.2. Tregu përkatës gjeografik:** Për vlerësimin e këtij transaksioni dhe efektet që do të sjellë në treg, tregu përkatës gjeografik do të konsiderohet **tregu i brendshëm** / territori i Republikës së Shqipërisë.

<sup>2</sup> Burimi Ekstrakt i Regjistrin Tregtar për shoqërinë CEZ A.S, datë 17.03.2009 dhe Formulari i thjeshtuar i njoftimit të përqendrimit.

<sup>3</sup> Burimi: Pasqyrat Financiare të Audituar dhe Raporti i Audituesve të Pavarur për vitin 2008

<sup>4</sup> Burimi: Faqja e internetit [www.xe.com](http://www.xe.com), 1 CZK =4.93 Lekë

<sup>5</sup> Burimi: Pasqyrat Financiare për vitin 2008

Sistemi i shpërndarjes është i ndarë në 10 qendra rajonale shërbimi, të cilat shërbejnë për tensione me voltazh të ulët dhe të mesëm dhe 5 zona me tension me voltazh të lartë. Shumica e zonave janë të ndara në katër dhe pesë agjensi. Numri i agjensive shkon deri në 39.

Megjithëse palët pjesëmarrëse në përqëndrim ushtrojnë veprimtarinë e tyre në të njëjtin nivel tregu të furnizimit dhe shpërndarjes së energjisë elektrike, veçojmë që në tregun e brendshëm, vetëm OSSH është e pranishme aktualisht.

## **V. Mbrojtja e konsumatorit dhe kuadri ligjor**

Veprimtaritë në sektorin e energjisë elektrike rregullohen nga Ligji nr. 9072, datë 22.5.2003 “Për sektorin e energjisë elektrike”, të ndryshuar, i cili përcakton të drejtat dhe detyrat e personave fizikë dhe juridikë, të administratës publike të përfshirë në këtë sektor, si dhe procedurat për përzgjedhjen dhe zhvillimin e një modeli tregu dhe të rregullave të funksionimit të tij

Institucioni rregullator i sektorit të energjisë elektrike që vepron sipas këtij ligji është Enti Rregullator i Sektorit të Energjisë Elektrike (ERE), që ndër të tjera, përcakton dhe rregullon tarifën e shitjes me shumicë dhe me pakicë, afatet dhe kushtet e shërbimit të energjisë elektrike, të propozuara nga i licensuari ose i rishikon ato në përputhje me rrethanat; garanton që programet e investimeve dhe kontratat e blerjeve të energjisë elektrike të jenë në përputhje me parimet e planifikimit me koston më të ulët; mbron interesat e konsumatoreve të energjisë elektrike për tarifën, duke garantuar që këto tarifa janë në përputhje me parimet e vendosjes së tarifave; ruan ekuilibrin ndërmjet interesave të konsumatoreve, shtetit, investitorëve dhe pjesëmarrësve të tjerë në sektorin e energjisë elektrike; nxit konkurrencën në sektorin e energjisë elektrike; kontrollon nëse i licensuari, që ofron shërbimin me energji elektrike për konsumatorët, respekton kushtet e kontratës ose siguron shërbime, sipas standardeve të vendosura në license ose në ndonjë rregullore të miratuar nga ERE-ja etj.

Te gjitha marrëveshjet në tregun e parregulluar<sup>6</sup> janë objekt monitorimi nga ERE për të siguruar funksionimin siç duhet të tregut dhe se pjesëmarrësit e tregut nuk ushtrojnë fuqi tregu ose ndjekin praktika të pandershme tregtare.

ERE ka vendosur që periudha 1 Janar 2009 - 31 Dhjetor 2009 të jetë një periudhë tranzitore gjatë së cilës nuk do të ketë ndryshim në tarifën ekzistuese<sup>7</sup>,

<sup>6</sup> Në bazë të nenit 4.13 “Modeli shqiptar i tregut” Marrëveshjet e parregulluara janë:

- Ndermjet Furnizuesve të Kualifikuar dhe Klienteve të Kualifikuar;
- Ndermjet PVE-ve, PPE-ve, Furnizuesve të Kualifikuar dhe Tregtuesve;
- Ndermjet Furnizuesit Publik me Shumicë dhe PPE-ve, PVE-ve, Furnizuesve të Kualifikuar dhe Tregtuesve;
- Ndermjet OSSH-se dhe Tregtuesve, Furnizuesve të Kualifikuar, PPE-ve dhe PVE-ve për energjinë e nevojshme për të mbuluar humbjet në sistemin e shpërndarjes.

<sup>7</sup> Burimi : Deklarata rregullatore e miratuar në datë , 03.03.2009.

te percaktuara me Vendimin e saj Nr.21, date 14 shkurt 2008. Në këtë mënyrë do t'i jepet mundësia investitorit të vlerësojë situatën brenda OSSH-së dhe të përgatisë aplikimin për rishikimin e këtyre tarifave të reja jo me vonë se 30 shtator 2009. Tarifat e reja do të jenë efektive duke filluar nga data 01 janar 2010. Periudhat vijuese te rregullimit do të jenë nga 3 deri në 5 vjet.

## **V. Analiza e konkurrencës**

Shoqëria OSSH SH.A ka pozita monopol në tregun e shpërndarjes dhe furnizimit me energji elektrike dhe ky transaksion nuk ndryshon strukturën e tregut, por vetëm mënyrën e operimit të këtij tregu nga një monopol të zotëruar nga shteti te një investitor privat.

Tregu i shpërndarjes dhe furnizimit të energjisë elektrike është një treg i rregulluar nën mbikqyrjen e Entit Rregullator të Energjisë Elektrike, i cili ka kompetencë të miratojë tarifat dhe metodologjitë e llogaritjes së çmimit për konsumatorët finalë<sup>8</sup>.

Enti Rregullator të Energjisë Elektrike në bazë të nenit 69 të ligjit nr.9121 "Për mbrojtjen e konkurrencës", i ndryshuar, dhe në zbatim të Memorandumit të Bashkëpunimit me Autoritetin e Konkurrencës duhet të kërkojë vlerësimin ligjor pranë këtij institucioni përpara miratimit të metodologjive të tarifave dhe të akteve të tjera rregullatore që mund të prekin tregun përkatës.

Në kuptim të nenit 56, pika 1 të ligjit nr 9121 "Për mbrojtjen e konkurrencës", Autoriteti i Konkurrencës ka vlerësuar impaktin që mund të sjellë ky përqendrim në treg nëse shfaq shenja të krijimit apo forcimit të pozitës dominuese.

Si konkluzion, transaksioni i njoftuar nuk krijon ose forcon pozitën dominuese të shoqërisë pas përqendrimit.

## **PËR KËTO ARSYE**

Në bazë të nenit 24, shkronja d, dhe nenit 56 pika 1, nenit 69 të Ligjit nr. 9121, datë 28.07.2003 "Për mbrojtjen e konkurrencës":

## **VENDOSI:**

1. Të autorizojë përqendrimin e realizuar nëpërmjet shitblerjes së 76 % të aksioneve të OSSH SH.A nga Ministria e Ekonomisë, Tregtisë dhe Energjetikës tek shoqëria Cez a.s.

---

<sup>8</sup> E parashikuar edhe në Direktivën 2003/54/EC

2. Ngarkohet Sekretari i Përgjithshëm për monitorimin e drejtëpërdrejtë të tregut të energjisë elektrike.

3. Ngarkohet Sekretari i Përgjithshëm për njoftimin e palëve pjesëmarrëse në trasaksion si dhe Entit Rregullator të Energjisë Elektrike.

Ky vendim hyn në fuqi menjëherë.

### **KOMISIONI I KONKURRENCËS**

**Lush PERPALI**

(\_\_\_\_\_)

**Zv/Kryetar**

**Servete GRUDA**

(\_\_\_\_\_)

**Anëtar**

**Koço BROKA**

(\_\_\_\_\_)

**Anëtar**

**Rezana KONOMI**

(\_\_\_\_\_)

**Anëtar**

**Lindita MILO (LATI)**

\_\_\_\_\_  
KRYETARE